

Daco far part dalla GiuRu?

La presidenta Naomi Arpagaus dat plaid e fatg

Carmen Monn/FMR

Dacuort ha la GiuRu tarmess in questunari per eruir il meini dalla giuventetgna romontscha. Varga 250 giuvenils han gia rispundiu allas damondas. La Giuventegna Rumantscha exista dapi gl'onn 1991 e ha la finamira da promover ils contacts denter ils giuvenils dallas tschun differentas regiuns romontschas e dalla Bassa. Dacuort hai era jeu retschert in messadi entras l'Uniun da giuventetgna da Sumvitg. Ei setracta d'in questunari tarmess als giuvenils romontschs. Jeu hai discuriu culla presidenta *Naomi Arpagaus* (20) da Laax e vuliu saver daco che la GiuRu ha lantschau quei questunari e cunzun tgei avantatgs che l'organisaziun porscha a giuvenils sco jeu.

Interess dils giuvenils

«Nus havein creau quei questunari per eruir il status quo: Quei munta che nus havein vuliu saver tgi ch'enonuscha la GiuRu, tgi ch'ei forsa gia commember e cunzun era tgei interess ch'ils giuvenils romontschs han actualmein», di Naomi Arpagaus. La giuvna ei gest vegnida eligida sco presidenta dall'uniun. Entras il questunari sperien els era da cattar nov(a)s participont(a)s. «Nus havein ver 300 commembers e commembras, denton mo rodund 50 ein veramein activs». Ella manegia ch'ei seigi pli interessant sche differenta glied cun in vast spectrum da meinis seigi involvada. Las giuvnas ed ils giuvens romontschs han aunc peda da rispunder al questunari entochen la fin da quest meins.

Purschidas attractivas

Alla damonda, co ella hagi empiriu d'enconuscher la GiuRu, di la studenta d'intermediaziun d'art e design alla Scola d'art a Berna il suandont: «Jeu hai udiu l'emprema ga dalla GiuRu entras in collega dil gimnasi. Silsuenter sun jeu separticipada alla radunonza generala ed hai gest surpriu il post d'assessura.» Ella ei stada responsabla per la gruppa da lavur «vuschs giuvnas» che scriveva mintga meins in artechel en La Quotidiana. Ussa senumna quella rubrica dil reminent «ils zulprins». Treis onns pli tard eis ella vegnida eligida sco presidenta ed ha plascher da saver s'engaschar al tgamun per l'uniun. Jeu hai dumandau ella tgei che seigien ils avantatgs per giuvenils sco jeu da far part dalla GiuRu: «L'uniun porscha pusseivladads fetg attractivas. Nus sustenin projects da giuvenils romontschs, era projects ch'ei pli gronds e basegnan sustegn finanziel. Entras il commembradi dalla GiuRu sas ti era separticipar favoreivlamein a nossas excursiuns culla YEN (Uniun tetgala dallas minoritads linguisticas dall'Europa). Leu sas ti s'inscuntrar cun persunas che discuoran in lungatg minoritar sco quei che ti plaidas.» Plinavon astga la GiuRu tarmetter quater commembras e commembers alla radunonza generala dalla Lia Rumantscha. Aschia ei era la giuventetgna representada ell'uniun tetgala dils Romontschs.

Interess e giavischs

Quei che distingua la GiuRu dad autras uniuns da giuventegna ei il fatg ch' ils members discuoran differents idioms. «Aschia emprend'ins d'enconuscher persunas d'autras regions dil Grischun e dalla Bassa», menziuna Naomi Arpagaus. Talas scuntradas seigien ina buna pusseivladad per arver igl agen horizont. «Naturalmein ein ils interess ed ils giavischs dils commembers e dallas commembras buc adina identics. Entras la GiuRu s'entupa fetg differenta glied; il sulet che colligia nus ei che nus essan giuvens e discurrin romontsch.» Quei stoppi denton buc esser enzatgei negativ. «Aschia cattein nus ideas vastas e savein realisar differents projects e schizun collaborar cun autras uniuns da giuventetgna», menziuna la presidenta.

* Annotaziun: Da niev ei il questunari era accessibels per tut ils giuvenils romontschs silla pagina d'Instagram «giuventetgna» e silla pagina da Facebook «Giuventetgna Rumantscha GiuRu».

